

Kerajaan Sasar Dua Pertiga Banduan Jalani Pemulihan Di Luar Penjara Pada 2020
Bernama
12 September, 2012

KOTA BAHARU, 12 Sept (Bernama) -- Kementerian Dalam Negeri menyasarkan dua pertiga daripada jumlah keseluruhan banduan di seluruh negara menjalani program pemulihan di luar tembok penjara pada 2020.

Timbalan Menterinya Datuk Wira Abu Seman Yusop berkata mereka akan ditempatkan di tempat tertentu seperti pusat-pusat latihan yang membolehkan banduan itu berdikari apabila selesai tempoh penahanan mereka.

"Kita mahu mereka ini diterima baik oleh masyarakat di luar tembok penjara yang apabila keluar nanti mereka boleh berdikari dan tidak lagi kembali ke jalan yang salah.

"Selain itu dengan pengurangan jumlah banduan di penjara, kerajaan akan dapat menjimatkan kos perbelanjaan yang ditanggung selama ini," katanya kepada pemberita selepas merasmikan Rumah Perantaraan Jabatan Penjara Kelantan di sini, Rabu.

Abu Seman berkata kini terdapat lebih 40,000 banduan di seluruh negara yang mana kerajaan membelanjakan sebanyak RM35 sehari bagi setiap banduan itu.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=694082>